



## 《张协全集》

### 咏史

昔在西京时。朝野多欢娱。蔼蔼东都门。羣公祖二疏。朱轩曜金城。供帐临长衢。达人知止足。遗荣忽如无。抽簪解朝衣。散发归海隅。行人为陨涕。贤哉此大夫。挥金乐当年。岁暮不留储。顾谓四座宾。多财为累愚。清风激万代。名与天壤俱。咄此蝉冕客。君绅宜见书。

### 杂诗十首

一

秋夜凉风起。清气荡暄浊。蜻蛉吟阶下。飞蛾拂明烛。君子从远役。佳人守茕独。离居几何时。钻燧忽改木。房栊无行迹。庭草萋以绿。青苔依空墙。蜘蛛网四屋。感物多所怀。沈忧结心曲。

二

大火流坤维。白日驰西陆。浮阳映翠林。回飏扇绿竹。飞雨洒朝兰。轻露栖丛菊。龙蛰暄气凝。天高万物肃。弱条不重结。芳蕤岂再馥。人生瀛海内。忽如鸟过目。川上之叹逝。前修以自勗。

三

金风扇素节。丹霞启阴期。腾云似涌烟。密雨如散丝。寒花发黄采。秋草含绿滋。闲居玩万物。离羣恋所思。案无萧氏牍。庭无贡公綦。高尚遗王侯。道积自成基。至人不婴物。余风足染时。

四

朝霞迎白日。丹气临昞谷。翳翳结繁云。森森散雨足。轻风摧劲草。凝霜竦高木。密叶日夜疏。丛林森如束。畴昔叹时迟。晚节悲年促。岁暮怀百忧。将从季主卜。

五

昔我资章甫。聊以适诸越。行行入幽荒。瓠貉从祝发。穷年非所用。此货将安设。瓠瓠夸巧璠。鱼目笑明月。不见郢

中歌。能否居然别。阳春无和者。巴人皆下节。流俗多昏迷。此理谁能察。

## 六

朝登鲁阳关。狭路峭且深。流涧万余丈。围木数千寻。咆虎响穷山。鸣鹤聒空林。凄风为我啸。百籁坐自吟。感物多思情。在险易常心。謁来戒不虞。挺辔越飞岑。王阳驱九折。周文走岑崑。经阻贵勿迟。此理着来今。

## 七

此乡非吾地。此郭非吾城。羈旅无定心。翩翩如悬旌。出睹军马阵。入闻鞞鼓声。常惧羽檄飞。神武一朝征。长铗鸣鞘中。烽火列边亭。舍我衡门衣。更被缣胡纓。畴昔怀微志。帷幕窃所经。何必操干戈。堂上有奇兵。折冲樽俎间。制胜在两楹。巧迟不足称。拙速乃垂名。

## 八

述职投边城。羈束戎旅间。下车如昨日。望舒四五圆。借问此何时。胡蝶飞南园。流波恋旧浦。行云思故山。闽越衣文蛇。胡马愿度燕。风土安所习。由来有固然。

## 九

结宇穷冈曲。耦耕幽藪阴。荒庭寂以闲。幽岫峭且深。凄风起东谷。有澗兴南岑。虽无箕毕期。肤寸自成霖。泽雉登垄雠。寒猿抚条吟。溪壑无人迹。荒楚郁萧森。投耒循岸垂。时闻樵采音。重基可拟志。回渊可比心。养真尚无为。道胜贵陆沉。游思竹素园。寄辞翰墨林。

## 十

墨螭跃重渊。商羊儻野庭。飞帘应南箕。丰隆迎号屏。云根临八极。雨足洒四溟。霖沥过二旬。散漫亚九龄。阶下伏泉涌。堂上水衣生。洪潦浩方割。人怀昏垫情。沉液漱陈根。绿叶腐秋茎。里无曲突烟。路无行轮声。环堵自頽毁。垣间不隐形。尺烬重寻桂。红粒贵瑶琼。君子守固穷。在约不爽贞。虽荣田方赠。渐为沟壑名。取志于陵子。比足黔娄生。

## 杂诗

太昊启东节。春郊礼青祗。鹰化日夜分。雷动寒暑离。飞泽洗冬条。浮颺解春澌。采虹纓高云。文虬鸣阴池。冲气扇九垓。苍生衍四垂。时至万实成。化周天地移。

## 游仙诗

峥嵘玄圃深。嵯峨天岭峭。亭馆笼云构。修梁流三曜。兰葩盖岭披。清风绿隩啸。

## 诗

天气清和。野有甘瓜。

采菱歌

乘鸂舟兮为水嬉。临芳洲兮拔灵芝。

---

[www.poetry-cn.com](http://www.poetry-cn.com)

中国诗歌网版权所有

转载文章请注明出自中国诗歌网